

第四十四卷

墓志九首

第四十五卷

墓志八首

第四十六卷

墓志十一首

空同先生集卷第四十四

北郡李夢陽撰



文

墓志九首

寄傲先生墓志銘

明故王文顯墓志銘

明故李大法合葬志銘

賈道成墓志銘

明故何君合葬志銘

明故蔡思賢墓志銘

江都縣丞蘇君墓志銘

明故遙授滄州判官賈君墓志銘

封徵仕郎中書舍人何公合葬墓志

墓志九首

寄傲先生墓志銘

先生名玉字廷瑞姓韓氏通許縣人也初先生舉於鄉拜郟城知縣郟邑小而賦繁民弗堪也以是困先生憐焉而例體邑政無巨細必關白於所司令始行或見弗之合即美格閣以是民愈困先生於是則竊嘆曰若是奚令爲也凡其細則輒自標號行不盡關白所司於是所司怒督責之而先生則又抗言執理往往無尊異色於是所司謂先生傲轉相擠陵斥先生乃棄官歸稱寄傲子而通許俗人士大都宴會酒懽爲適罷官則更放騁而出其官時所營製如冠袍裘馬器皿華綺諸等盡銜耀鄉人曰不如是猶夜行

也而先生歸則獨嗜古書奇字性又不酒第閉門坐課兒孫曹於是大爲鄉人所不悅目爲韓恠而先生稔患目又寡言咲對客長揖寒暄而已第瞑目坐於是人益遠先生先生弗動也今俗喪即人士家崇豪華文具先生父母喪也則惟據典實廬之墓兩喪者六年以斯觀之其平生足推矣大梁人李知縣者先生姊夫也每招之來會其長子禹卿從空同子游又其孫叢爲儀賓而其同邑李知府亦罷郡居大梁正德末先生乃徙大梁居焉是時道州何公以都御史巡撫河南聞先生有數學敦禮之叩焉先生辭謝卒不傳嘉靖二年七月空同子會先生於酒筵見其篇

文富贍而漸巖驚曰寄傲今七十歲矣乃爲此大文
那時李知府亦在坐曰寄傲尚作蠅頭楷字與人札
即片紙吾未見一畫苟也空同子喜曰壽徵壽徵居
無何儀賓薨喪其配君禹卿喪其妻而先生亦不起
矣於乎於乎是年八月十八日也按韓氏其先項人
也諱諒者始遷通許而先生父諱敦嘗爲臨淮知縣
東城兵馬指揮娶劉氏以景泰某年三月廿八日生
先生先生配苗氏有子五人女一人壻曰賈希朱孫
男女某某卒後兩月禹卿奉其柩返塋通許之塋并
其二喪舉云銘曰胡爲而官三歲而掛汝冠胡爲而
遷與其二喪同旋於乎孰昇子以賢孰躋之使顛孰
嗇之使寒悠悠乎蒼天

明故王文顯墓志銘

王文顯者蒲商也名現字文顯號噫菴子初文顯爲
士不成乃出爲商嘗西至洮隴踰張掖燉煌窮玉塞
歷金城已轉而入巴蜀沿長江下吳越已又涉汾晉
踐涇原邁九河翱翔長蘆之域竟客死鄭家口先是
王教諭有五男而文顯長父官旣卑貧又四弟望我
立以是文顯乃棄士而就商商四十餘年百貨心歷
足跡且半天下然卒老於鹽場文顯之爲商也善心
計識重輕能時低昂以故饒裕與人交信義秋霜能
析利於毫毛故人樂助其資斧又善審勢伸縮故終

其身弗陷於穽羅文顯既以商起家乃大室廬備賓
祭畢婚嫁四弟各成立王氏固奕奕彰矣而教諭君
罷歸顧獨出分其長子文顯則第涕泣自咎責固攸
辯乃效作五噫之歌歌曰仰彼昊天兮白雲霽霽噫
莫慰父心兮子之罪噫朝入埽除兮出而暮思噫清
風飄裳兮明月鑿之噫古有履霜兮實獲我志噫歌
畢遂號噫菴子教諭君聞之悔泣父子如初弟珂者
之舉於鄉也會文顯省親歸稱觴遞壽其父顧之喜
曰兄商而利弟士而名乃吾今何憾矣文顯嘗讀史
以孔明取劉璋爲是又謂宋黨禍成於蘇公非程子
激之也間質於其父父則又大驚喜曰現也汝商而

士邪乃吾今何憾矣吳龍者僮也嘗竊於文顯文顯
寬之一日外盜求文顯急執龍刃脅之龍卒不言文
顯匿所其父聞之則又大驚喜曰現也利而義者邪
然天固鑿之邪文顯嘗訓諸子曰夫商與士異術而
同心故善商者處財貨之場而修高明之行是故雖
利而不汙善士者引先王之經而絕貨利之徑是故
必名而有成故利以義制名以清修各守其業天之
鑿也如此則子孫必昌身安而家肥矣按衛推官張
君狀王氏榮河人也諱仲文者元末徙蒲耕於蒲南
十里今稱王家庄是也仲文生彥純彥純生景嚴景
嚴生秉信秉信生王榮賓鄉飲以壽官榮生馨教諭

者也教諭娶張氏以成化五年九月十日生文顯嘉
靖二年五月九日卒年五十五歲娶潘氏生崇仁崇
先崇道州學生也女二長適監生李廷光次聘蔣澄
孫男二人女三人文顯既卒之明年二月其日葬東
原之坐銘曰珠不珍貢而輝汝淵鶴不翼天而唳汝
田我得匪苟我室則盈我有不有我利則成義不入
於穴仁而免於盜兵逾艾而殞於旅茲天邪人邪數
邪

明故李大法合葬志銘

李大法者予門人李瑛之父也名倫字大法祥符人
也而居之杞大法父曰李洪洪父祿祿父讓初洪武

辛巳河灌大梁於是讓挈家走杞水平或勸之歸讓
曰梁杞百里耳何必歸後辛巳河又灌大梁讓子孫
遂免于走明年壬午九月二十日大法生于杞正德
十六年歲又辛巳人詢詢謂河且復來是時瑛以學
諸生寓梁或勸大法胡不俾而郎回杞大法咲曰天
地數若是齊邪已而河卒不來大法娶于崔瑛母也
崔生天順癸未三月八日後癸未是為嘉靖二年三
月三日而崔氏卒大法素雄飲慷慨無憂少貧嘗為
親負米力販魚蓋然處之灑如也及崔卒則顧麟爵
有戚容於是瑛蹠問曰父何憂也大法於是仰天長
吁良久曰嗟吾將去汝曹是以憂也瑛曰兇聞之陰

德陽報父饒直無私曲惠流於窮人孝弟忠厚鄉閭
信之斯必壽大法曰嗟汝諸生也不知天道邪天數
周則易世之人逃焉者寡矣汝母不癸未生癸未死
邪明年甲申二月二十一日大法果卒於是君子謂
大法知天順命李瑛問其師曰仁者有不壽乎曰有
之仁而壽者理也或不者其數也仁而謂必壽則堯
舜周孔雖至今存可也於是瑛吞聲哭曰父未嘗學
而知天順命已而曰吾母之奉姑也姑矇母籲天願
以身代者六年而姑目復開其事夫也罔不敬也然
罔不勤也如是而弗之壽亦數否邪李子曰嗟瑛脩
短非所論人顏跖是也自教之衰也孝弟忠信之士

不表於鄉閭於是田野篤行率閭焉無聞如大法者
夫婦純懿設非其子瑛以文學與縉紳游即美誰其
知者於乎斯足以觀世矣大法子二長琨取屈氏次
者瑛也取馬氏女二一適杜生王用中一適温舉孫
男五人女三人以卒之年月日塋祀東郭堤外祖塋
與崔合銘曰人也蓋爾行則蹶爾祀東門原有穴窾
爾配與之同亦云遂爾千秋萬歲佳城蒼蒼

賈道成墓志銘

賈道成者通許縣人也父曰賈定山西按察司僉事
母曰劉宜人以成化甲午四月二十日生道成生踰
年而其母亡又二十二年其父亡賈生乃奮厲自立

力學曰始吾名也父名我曰希朱及字也字我道成
斯非望我為紫陽徒邪於是志洛閩之紹而深之以
造乃賈生顧又專易嘗俯仰高下旁觀流形而問李
子曰月盈虧者何也李子曰日映之也光之虧也去
日遐抑又聞月丸也視側則光虧賈生曰丸之譬謬
也夫既日映之也彼生之哉也懸如弓或又瓦仰何
也又嘗問李子聖人觀象而繫辭也三極獨不言象
何也李子曰道包象邪動者道邪賈生不荅賈生游
郡學廩矣竟錄於有司人於是頗咎賈生曰文奚
不時也或曰賈生韜默或曰枯而神短賈生聞之亦
不荅乃顧嗜吟正德戊寅九日李子賈生共汎城隅

之陂賈生詩曰波水澄霽澹澹浩浩樓臺感沓林石
晶窈霜露載零徑蘭凋槁偉彼松筠哀此衆草人生
幾何榮名是寶辭調高逸李子未之和也第扣舷歌
薰葭之章應焉已而賈生還邑則又作詩曰郊原曠
以修零霜一何凄飢鴉噪枯桑故城委蒿藜黃鵠輕
四海游子乃念歸懷瞻顧里閭怛焉傷路岐意若自
傷靡遇者人於是頗復狹賈生疑之踰年而賈生病
死矣正德己卯五月二日也年四十六矣賈生即病
顧猶不輟吟病間目其弟希尚曰吾作一詩自吊誦
畢瞑希尚及從群弟侍聞之皆泣賈生復睜目曰斯
何傷古誰不死遂長瞑生嘗自謂渫泉子凡所述稱

滌泉子云亦其不食讖歟初生喪弟喪妹喪繼母妻
喪兄已復喪妻妻知縣韓玉女也無男女遂絕希尚
奉兄柩以卒之年十月十日葬之父墓之側李子曰
予嘗志其父墓矣是故於賈生不復及其家世銘曰
家將與賢者先生家將殃才者先亡其生也登其亡
也崩夫賈氏者顯也積五世矣及其季也纍然衰經
之繼也吊者出而唁者至矣嗚呼道成胡亡胡生吾
女銘乎

明故何君合葬志銘

何儀賓文昱者我從孫外舅也一日李子酒會要何
不來問何何不來也曰奔母喪耳李子瞿然驚曰乃

予聞其母疾曰其母足背丁白而粟母弗謂其丁
也瓜破之已又難而行丁乃走內攻母竟死後數日
何儀賓來我泣而丐銘問之果然又問奚兆何曰吾
父沒廿年餘矣母丁之前夜夢父馬而過叱母曰速
從我來按何氏其先河間人也後徙汴耕朱仙鎮西
曰全者壽官也生二子長曰何君諱禮字大用娶陳
氏先卒再娶慕氏生四子長儀賓也配沁源郡君次
文昇次文晨次文星縣學生二女一適劉鷺一爲鎮
國將軍夫人初從孫議婚也人皆曰何儀賓賢問何
賢曰貴而禮問其父人又皆曰何君賢問何賢曰富
而義旣婚也李子之嫂會慕氏歸而又稱慕氏賢問

何賢曰默而和李子曰立莫大於禮利莫先於義默莫要於和夫何氏者三善備矣烏得而不與何君生正統五年十二月九日卒弘治十四年三月一日得年五十五歲陳氏生正統九年十月十日卒成化十七年七月廿八日得年三十一歲慕氏生天順八年七月九日卒嘉靖元年十一月十五日得年五十九歲合葬西韓林之墓銘曰天之道還兮地之義完兮還視爾履完視爾美美哉爾阡穿不及泉吉而安兮

明故蔡思賢墓志銘

蔡思賢者夷門之隱人也名鑑字思賢號淨居道人初蔡之冠也筮賓敦典議字焉蔡長揖謂賓曰字我

曰思賢賓問何也曰竊聞之鑑以鑑貌人以鑑心非賢不可吾其思之矣其長也勤敏以周物恭儉以裁用和易以混俗廣施以闡仁擯惡以克義敦詩書以訓來陳古今以驗往其久也質往者服濡訓者革耻擯者避德施者親於俗無睽在用靡匱物藏行成君子於是謂蔡子善自字其老也稀省以息慮玄冲以導和游適以陶真鯁退以諧物是故身鮮疢疾家無橫非人無詬謗兄弟式睦子貴大州蓬蓬于于怡然考終斯隱人之行也李子曰予於蔡有三徵焉夫安壽吉者天之所以優善類者也蔡氏備之足稱善人矣孔子曰善人吾不得而見之矣得見有恒者斯可

矣予今見之不足占世乎按蔡氏其先潯陽人也名宗先者國初從軍南征渡采石充海船米字號牌總兼領庫船嘗赴景陵衛投戰檄賞銅鐵五石已論平陳功又賞銅錢漿酪諸等曰蔡保者隸彭城衛護周王來樂間調護衛入京而保以鞍匠留侍王遂居大梁保配王氏生子四長曰玉次曰琰次曰良又次曰璟琰配鄭氏生子二長即思賢次曰銘生女一侍周懿王封夫人思賢配蔣氏生子三長曰俊信陵王典膳次曰俸濱州知州次曰佩思賢生宣德壬子九月十九日卒嘉靖癸未四月九日得年九十二歲弘治末嘗詔拜壽官蔣氏生正統庚申正月二十三日卒

正德乙亥二月十一日得年七十七歲蔣之卒也業塋土城南故雞鵝池地於是啓其窀與夫合是年七月有八日也銘曰蔡子篤行爰以孝聞嘗糞顙天介福何云蔣也相之執恭守勤奉姑服勞或至夜分子剖郡符飭躬流芬雙玉載瘞連理同墳於惟茲野有賢在下過者立馬厥淚攸灑

江都縣丞蘇君墓志銘

江都縣丞蘇君者尉氏栢岡里人也名琇字彥器大父春生五子第四曰明明亦五子第三曰蘇君蘇君亦五子第五曰濟衆來請銘其父墓往左生告余曰蘇君蓋少時一憧憧人也然顧內修攻學學足以第

也然乃竟不第竟爲丞其始爲丞也人告之曰江都
土浮俗僞蘇君曰嗟是欲使我先僞逆之邪夫僞逆
之必先覘顏色顏色之不得必機關其言語言語之
不得必鉤贖其陰細此而不得必有誤中之民矣安
有爲人上而忍爲此者邪卒不以僞逆江都民江都
民見其丞誠也亦率誠事丞居無何蘇君歸民相挽
留泣曰丞柰何歸蘇君曰田荒矣歸欲鋤之耳民曰
鋤田勞孰與爲丞君咲曰汝謂丞爲逸乎竟歸徜徉
以壽終今按厥子銘狀蓋蘇君生正統三年十一月
四日卒正德五年八月五日得七十有三歲在生稱
其壽是矣狀曰以明年三月一日葬城西之原又曰
蘇君五子皆出自韓氏其父五子皆自王氏其大父
五子皆自某氏銘曰東有嘯臺塘如滂如蘇冢在西
斧如堂如其中坎如並峙儼如

明故遥授滄州判官賈君墓志銘

賈君者通許縣人也蓋賈氏世居通許今其墓有三
一曰韓朱岡墓一曰郭東墓二墓者賈氏宋元以來
墓也纍纍相望一曰三里岡墓則塋君曾祖以下君
曾祖諱贊洪武間以人才爲鉛山縣知縣贊生麟封
監察御史麟生恪少與婁良齊名語曰婁良賈恪氣
如山岳恪舉進士官至山東參議是爲參議君參議
君有三子而賈君長最賢二弟又並賢顯貴無忝於

賈君以故通許人推豪鉅族無能先賈氏于是賈氏
族聞天下而賈君又自譔次其世系播之人故賈氏
諸所名德及諸陰細行可誦說者乃咸由是彰矣故
曰成賈氏者賈君也天順間募馬實邊賈君入其馬
爲監生已患癰癩鬚眉皓皓爾叅議君會又卒賈君
乃力上書辭曰臣疾弗克事事願給空銜養母歿身
許之得遥授滄州判官拜于家前叅議君致其仕來
居大梁日與老長會約遊大梁人蓋咸望風尊敬之
及君拜官亦日與老長會約遊而大梁人輒又望風
尊敬之顧愈甚故人爲之語曰賈君善繼志賈君性
靜重少言不喜酒遇酒到口輒推去然坐竟席席上

人即嘒嘒啾啾宣拳臂相狎侮賈君第坐顧竟席席
上有歌舞女賈君第坐如無歌舞女即竟席不見其
不衣冠歸也夫鄉飲者天下之大防也今鄉里無賴
子弟類鑽刺深衣大帶炫曜而官宦士謂不甚損益
而弗省也及賈君爲鄉飲賓乃遂言鄉飲禮頗施行
然今亡矣其生以正統七年七月三日卒正德四年
五月十七日年六十有八歲取王氏生二子希程希
吳一女爲輔國將軍夫人繼取耿氏生三子希高希
言平定郡君儀賓希冉一女適李輅君名宏字仲仁
號懶雲居士云銘曰有雲泚泚以觀我時其行施施
卷於違雲奚悲

封徵仕郎中書舍人何公合葬墓志

信陽何景明爲中書舍人無何即致仕歸歸逾年喪其父已又喪母將葬伊來乞銘余投涕曰余始與景明友蓋日想見其父母乃今不及見矣志曰封徵仕郎中書舍人何公者信陽州人也諱信字文實其先居羅田曾祖太山始徙信陽高皇帝過信陽樹二旗令曰爲我軍立紅旗下爲民白旗下於是太山即立白旗下太山生海海生鑑陰陽典術鑑生何公何公少使氣大言任謀然數困鮮成事人不之奇也有盧翁者識之女以女語人曰吾甥三十當有聞是後有異人產其家公三十果辟爲布政司承差見諸承差

者污賤無藉也又率務裘馬相高何公耻之獨潛飭行檢誦書久之頗自表見而布政使吳節因竊怪之特使董大役事出其金公則立辨顧又入其羨金請賑貸所全活以萬數吳公乃大喜以爲賢引置心腹成化末關中大飢詔發漕粟萬石至衛口曰河南發卒輓抵關當是時河南獨南陽汝寧熟於是河南乃即發南陽汝寧卒萬人將行何公聞之恚曰今關中米石不過直金一耳今柰何若是矣乃入言於吳公曰公誠權出帑金萬使入關糴可遂得萬石乃因令二郡曰能人出金一即罷若役仍給粟人一石二郡人知役且十倍費必踴躍人願出金一而不肯受粟

是公一舉活關中之民弭二郡嗷嗷之口而省粟萬石矣吳公曰善卒用其計何公於是有名河南然顧豪亢自負太監汪直至河南河南都御史以下震懾皆匍匐行上謁會直左右俾都御史劄屬括名馬都御史業已諾然手戰不能執筆汗簌簌下何公在旁曰都御史大臣不當煩吏事乃奪筆代都御史劄其無嚴貴幸如此其後爲會寧渭源二驛丞又有抗監貢獅番武官及禽巨猾李氏事今皆不詳第詳其著者焉何公爲人大段厲氣義不欲齷齪與世浮沉或見尊官大人有弗潔也則退而唾罵之而汪直過時按察使陳選見直獨長揖不拜何公終身嘆慕之曰

陳按察真男子也何公故病足往在渭源病足會御史行縣至縣簿尉以下當徒走奉輿馬行輒數十里何公於是仰天竊嘆曰嗟乎可以去矣遂即棄官歸然貧無馬騎有人資之車一乘馬一匹乃始歸而舍城西溪上即又日歌吟力田誦書郡人即無小大咸望風起敬公稱先生不曰何驛丞也乃後何公以子景明封官乃何公不欲稱其官稱曰梅溪居士郡人即又稱梅溪居士云先娶盧氏即前盧翁女盧翁有異術嘗以策干石將軍有功已棄之亡歸故不及於難繼娶李氏其父山東人也寓羅山盧家羅山盧家故與盧翁往來善盧翁因竊知李氏女賢及盧氏死

乃力主李氏女繼盧氏曰產異人者此女也乃後二
氏皆封孺人云盧氏生景韶累官東昌府通判卒景
暘舉人而李氏生景暉景明又生女適孟洋今爲行
人何公生某年月日卒某年月日年若干歲盧氏生
某年月日卒某年月日年若干歲李氏與何公生同
歲卒同月以某年月日合葬西山之麓

空同先生集卷第四十四

空同先生集卷第四十五

北郡李夢陽撰

文 墓志八首

凌谿先生墓志銘

明故 趙府教授封吏部考功司主事王公
合葬墓志銘

明故封翰林院編修文林郎賈公墓志銘

明故臨江府知府致仕尚公墓志銘

明故中順大夫衢州府知府李君墓志銘

明故中奉大夫四川右叅政崔公墓志銘

明故 博平王教授蕭君墓志銘

明故奉政大夫山西按察司僉事賈公合葬
墓志銘

墓志八首

凌溪先生墓志銘

嘉靖五年十二月乙丑中奉大夫雲南左叅政凌谿
先生卒于家越明年十二月庚申葬郭東三里官庄
原先是計至大梁其友人夢陽旣爲位哭將祭酒東
芻使使往奠之會其弟應辰以書狀來徵銘曰先生
天下士也先兄固雅善公敢以銘請而厥子藩致懇
辭更苦讀之令人淚簌簌下曰凌谿以文崇其身所
謂世人皆欲殺之者乃天亦忌之使弗延邪夫人者

顧子誅之備矣乃其心康之文足白之矣而予復
言者志曰凌谿先生姓朱氏名應登字升之揚之寶
應人也生而犖竒童時即解聲律諳詞章十五盡通
經史百家言其父江陵公者異之然懼其踰也約之
古凌谿悟乃著申臆賦以見志而力殫于淵學於是
飫醇探齷程猷經用噴英擣華樹聲藝林矣年二十
舉進士時顧華玉璘劉元瑞麟徐昌穀禎卿號江東
三才凌谿乃與並奮競騁吳楚之間歛爲俊國一時
篤古之士爭慕響臻樂與之交而執政者顧不之喜
惡抑之比人撲耻乏黼黻以經學自文曰後生不務
實即詩到李杜亦酒徒耳而柄文者承弊襲常方工

雕浮靡麗之詞取媚時眼見凌谿等古文詞愈惡抑
之曰是賣平天冠者於是凡號稱文學士率不獲列
于清銜乃凌谿則拜南京戶部主事陰欲困之凌谿
劾焚斷錯乃顧亨于官而其學愈淵居無何陞延平
知府意州郡吏必難乃凌谿爲之愈益亨乃於是陞
陝西按察副使使提學凌谿闢正學院群秦士高等
其中置官設徒豐餼嚴約談經講道至者且數千指
風教大行文自韓歐來學者無所師承迷昧顯則我
明旣興隆本雖切然要與未聞也及凌谿等出創覩
駭疑大不容於人人各以所不勝相壓而凌谿性挺
直不解假詞色於人更哆憎口恨不即寘之幸例調

荒裔往禦魍魅尋陞叅政卒罷去凌谿歸潜伏草莽
中溫繹前業期十年盡償所願而今亡矣噫嗟嗟悲
乎悲乎人忌之天亦忌之邪夫蛾眉胎禍才美殃毀
順往逆來孰非爾者然英人志士每甘心窮約而不
悔者徒以人者難必而天者足恃也十年之內徐何
載淪凌谿胥歿天實忌之矣人何尤哉噫嗟嗟悲乎
悲乎凌谿生成化十三年正月己未得年五十鑿旨
曰先富後貧病從内生言淺狹之易折也凌谿廓落
易直憎口日哆而聽之如蒼蠅過耳斯其量可與僊
僊心仙者道哉退研精肫推訂律歷運數讐史質經
底詮名實流覽今古橫睨宇宙視軒駟直芻狗耳大

命巾奪齋志長畢非天忌之而誰忌邪卒之日適邑
官來謁揖讓而氣絕斯病内生之否邪噫嗟嗟悲乎
悲乎凌谿他所奇節隱行與凡歷履宦業忠孝友義
言動細小莫之具述第述其生死大槩關運數者如
此詩文則自有集行于世江陵公諱訥封南京戶部
主事配范氏封安人江陵父瓘以處士州郡徵之不
應嘗與修英廟實錄處士父宗泰宗泰父彥明往會
凌谿面咨其家世趙宋間名之修者居于吳爲學官
宋季北徙徐名寶臣者元初爲將軍元季徙寶應我
朝名鼎者通判耀州後謫戍爲京衛兵然莫詳其系
次陵谿娶于陶亦封安人生子一曰藩孫子女各二

藩篤古世其家學朱氏弗衰矣銘曰陸有時洋湖有
時桑不崩者人於惟其文凌谿子墳

明故 趙府教授封吏部考功司主事王公

合葬志銘

王公者長安縣人也名琮字良璧嘗居東丘於是稱
東丘公云東丘公其先函人也而徙長安曰王鵬飛
者仕元爲同州判鵬飛生王瓚有名於元歷官中丞
嘗代祀岳鎮及郊泰定帝命以爵服從郊事是故其
遺像蟬貂焉中丞生擴擴生嗣祖嗣祖三歲孤克自
底於立然喜退晦嘗以祖蔭除涇陽簿已棄去嗣祖
生三子少者鐸也會 大明皇帝興 詔舉文學者

嗣祖懼乃羈其三子俾弗學鐸亦三子東丘公其少
云東丘公性剛執言論侃侃於人罔徒遜然嗜學勤
書有文初爲學官弟子即弗諸弟子羣諸弟子時時
敬憚之然心弗甘也東丘公置不理但日檢其身自
省修出則嚴冠衣端步趨行不流視立不疊談見者
愈疑異避公即諸弟子無敢公參也久之乃相語曰
東丘實乃相率師事公而親教諭普暉者福人也好
使氣凌諸弟子乃顧獨器公而言之學憲官於是學
憲官立召公與語悅之而知其中丞後也即又求中
丞像觀旣而曰王秀才長身玉立方瞳重頤望之若
神仙可謂無忝爾祖者矣普暉退而語人曰學憲識

人東丘公十試於有司不第竟歲貢補延津縣學訓
導秩滿陞 趙府教授是時 王壯盛頗究心於文
學公至則列十事以諫一曰忠言奉藩謹二曰孝言
權親備三曰格心四曰講學五曰親賢六曰遠佞七
曰絕翫八曰輟游九曰斥異端十曰減音樂援經證
史言率典則 王覽之嘉焉已謂左右曰恨得此人
晚耳與李長史同延顧諷齋君臣唯諾竟日而罷賜
綺衣各一襲自是禮貌隆重公入見 王必整衣冠
却伶優指示一二中官曰王先生好人侍 王蓋十
四年猶一日云今制子貴於父遇推封父免而封公
子納誨爲工部主事有 詔公當封 王聞之驚曰

王先生去我邪於是勉留公勿封未幾納誨改吏部
考功主事公又嘗封而納誨虞王留公堅乃於是移
書 王陳烏鳥情事 王不許納誨於是再書致

王詞殊懇惻其略曰夫心無終窮分有限隔即令父
皓首瘁躬於王朝如子職何故明哲抑情以全道仁
人錫類以成物言事有變常勢分緩迫難以例論也
況既老而傳春秋之義七十致事禮經之文揆之今
制罔乖古典父年踰七前途匪遠惟 王察焉會公
辭之亦力 王弗能留乃與妻許安人偕拜封就養
京邸云未幾公如易州又如河南艱關南北咸子故
許安人者教授許黠仲女而公同縣人也黠爲山陰

訓導生安人於山陰安人聰慧有識諳女誡諸書納
誨始認字安人業口授章句竟俾陟于顯其吏部遷
易州也安人無戚顏及陞河南按察僉事亦不之喜
或問其故安人曰夫芳臭者人通塞者天兒即賢何
憂乎賤貧一日僉事出閱因入告安人安人曰汝知
王賀于定國乎其慎之矣僉事跽而曰謹受教出閱
囚簿半報安人疾作倉皇返安人弗起矣僉事歸旣
葬禫而詣墓父與俱徃明日父疾作而卒僉事哭謂
人曰父之疾蓋重傷吾母云李子曰於乎予與僉事
鄉同榜署同 朝是故叙東丘公鑿鑿然猶漏其事
實夫資內以成理則家國成尚矣今觀許安人非其

證歟閱囚之誠予耳親焉已所謂齊德並壽者非歟
王公生正統丁巳八月廿五日卒正德丁丑九月五
日年八十一安人生正統壬戌十二月六日卒正德
乙亥四月廿六日年七十四王公卒之明年月日合
葬江村之兆納誨娶張氏生子大治女玉梅玉蘭繼
娶郝氏生女玉麟大治聘知縣許錫女三女咸名姻
銘曰大裔必熾八世是徵大名必升盈者以興於昭
王氏發之同州中丞實揚有碩其膚龍旂交交帝曰
汝郊錫爾侯服汝陟汝寵受福亦孔中葉載淪時及
而振涇陽蛇蟄東丘蠖伸伸而靡遂後英是蹶同理
殊榦共苞異柝合貞肖端有培孰遏

明故封翰林院編修文林郎賈公墓志銘

賈公者臨潁縣人也名瑛字宗玉嘗自曰人莫如我
樂號曰樂庵於是人稱賈樂翁云正德戊寅翁年九
十五矣會其子南京祭酒詠徵入道邑里會又翁生
日於是大置酒聚賓若族暨闔家觴翁上萬壽翁顧
謂祭酒公曰嗟詠汝行矣汝無吾憂吾無靡樂也祭
酒公退而遭延弗忍行翁復謂之曰嗟詠行矣無吾
憂吾謂天下無身加者是故於物也澆然吾生無欠
心事故寐也遽然動也孺然吾今九十有五年矣是
故獲不履於憂夫憂生於不足不足莫如子孫蒙乃
曹事我順誨之聽各修名顯立乃予奚所不足矣夫

不足或爭予見義慕之見不善避之是故於人無犯
色飽吾遨焉已醉吾陶焉已無靡樂也行矣汝無吾
憂祭酒公退而仍遭延弗忍行已而翁飲於外歸醉
而跌遽終是年十月十六日也君子曰孝哉賈子遭
延而終其親李子曰往予在朝與祭酒公友蓋數聞
賈翁性行云翁無不足然顧足無爭人顧莫與爭翁
慕義人慕之義避不善不善顧翁愧有不善恐翁聞
也於平斯所謂實德久則孚者邪往聞李某者假翁
田二百畝不歸翁笑而棄之語曰侮觀量迫觀守無
論他事即此則翁之處順常可知矣斯德之實非邪
君子曰實者名之生也故人莫大於自名亦莫大於

人所名故夫潛翁晦賢者居焉文中貞曜哲人謚焉
誠有謚賈翁者謂之德樂可矣翁生永樂甲辰八月
廿五日以子貴封翰林院編修文林郎爲鄉飲之賓
詔數又賜帛米肉云配曹氏封孺人先卒翁以卒之
年十二月十日啓孺人窆合焉墓在邑南祖塋之次
翁子五長曰誌義官以寫真名識者謂之神品次曰
讚會同館副使次曰謙次曰諧次曰詠鄉舉第一舉
進士授翰林院編修歷兩京祭酒文學行業爲天下
宗女一適李昌批驗大使翁有孫十人鄉舉暨學官
弟子者各二人曾孫八人玄孫九人按賈氏膠東侯
之後曰賈漢臣者仕元爲萬戶居鄭漢臣生景山元

陝西行省叅政始徙臨穎景山生彬字文質通子史
執義曜德學宮飲射則賓之年九十終配李氏生賈
翁云銘曰兵後我生生不識兵九朝太平百欠五
齡以歸以寧豐本遠條前奚弗超後奚弗昭旣昭厥
後我獨匪壽若翁者所謂全天者邪抑天全者邪

明故臨江府知府致仕尚公墓志銘

嘉靖二年九月一日臨江府知府致仕尚公卒其子
東巽等匍匐如梁請銘李子乃慨然而歎曰嗟吾美
儀今逝邪夫其弟美信者固予同年進者也則公於
吾猶兄也公睢人也諱縉字美儀號水南子其先嘉
興人曰官盛者軍于睢遂爲睢人官盛生尚雲從

太宗北伐沒之軍雲生興從南伐有功不錄君子謂
尚氏有後矣曰無言不酬者人之要也無德不報者
天之道也不于其身于其子孫尚氏之謂乎興生福
福生綱果舉進士又生縉又進士兄弟俱拜兵部主
事又繼守山海關君子於是謂尚氏有天生身遺其功
而兩孫登之庸成化丙午公調刑部爲員外郎有明
決聲孝宗立則特命之錄畿內之囚真定王清者
與鄰人高相毆而是夜高之妻與奸夫乘之殺高獄
莫能明者一十九年公一訊而得其情時稱神明歸
陞郎中雲南司掌京甸九三法司事無巨細由焉前
官每苦蹙蹙剛柔胥難而公則獨以能稱謂之尚一

火言一火鑄成也秉鈞者方擬擢公會杖殺衛尉乃
出公知臨江府府當楚粵之衝土習豪猾公至首擒
謝金薄等數十人又釋誣死罪者數人又贛有巨盜
公計勦獲之於是威行郡中而傳從學者兄弟訟產
累歲不決公至覽牘而嘆曰嗟民之愚如是邪立爲
剖白咸稱公爲再生包老在郡三年吏畏民懷秉鈞
者方擬擢公會章樹鎮稅課舊爲王府據者公奏奪
歸諸公遂遭構陷而公亦抗疏解印綬時年四十二
矣居無幾美中美信俱以叅議罷歸兄弟金紫每出
則冠蓋輝奕填塞閭里然位咸不稱德諺曰不竟其
祿子孫之穀君子於是謂尚氏長矣公生某年月日

距今卒之年得壽六十有九而林下者乃幾三十年
使究其用則公之業豈直前云云於乎悲夫悲夫公
父封工部員外郎母趙氏封宜人厥配劉封安人安
人先公卒繼者顧氏有子五人東明州學生東巽東
臨國學生劉出也東有東萃顧出也女三人長適指
揮使孫禮劉出次聘蔡指揮男蔡某次聘吳指揮男
吳英顧出孫男三女二公卒之年月日葬城北恒山
之原與劉氏合而公所著江西志水南彙睢州志諸
書東臨藏之家銘曰古稱大才迎刃是譬嗟我美儀
不習而吏孰云錯盤不鋒而剗旬月千牘剖之靡寬
或餽之金鄉媪是媒乃配怒之叱之而回喪或弗舉

配也則威勸夫助棺脫簪罔惜壽雖靡齊賢則媿之
二壁同瘞安斯永斯千秋有聞徵我銘辭

明故中順大夫衢州府知府李君墓志銘

李君者名志學字遜卿號雲厓子通許縣人也李氏
蓋其先封丘人曰李二公者以兵走通許居九女塚
二公生奉先奉先生循循生榮榮生李君李君生而
穎異讀書攻文年近四十始登進士第爲庶吉士拜
兵部車駕主事坐忤勢貴調真定府通判當正德辛
未壬申間霸州盜起雲擾中原所過城破落焚旗幟
蔽野鉦鼓震沸而真定屬邑多其衝者李君承委贊
畫周旋矢石間賊平與賞獲綵段明年陞蘇州府同

知尋陞戶部員外郎擢郎中總理宣府糧儲會武

宗幸宣府李君調度公私具足上以爲能而君貌

復俊偉善條對間有應制之作雅俗並陳上覽

之顏每爲之霽是時江彬用事嫉之計出君衢州府

知府一日上問李郎中何在知之乃自衢州召還

久之不得見彬蔽之故已而上崩李君乃遁還自

謂年逾五十古人所謂日暮途遙之時也敷歷中外

備嘗險艱身挂金紫囊有俸錢於布衣足矣乃絕意

仕進剗晦光彩營菟丘開竹林蠟東山之屐鼓西園

之瑟雖延黃冠叩玄秘談說化術然嗜醇甘耽姝豔

空同子見之嘗嘲之曰喧寂不共途動靜無並驅子

謂果有揚州鶴李李君曰根汚泥而挺清冷之上者蓮之所以神也故曰溷溷舍至道空同子曰否汚泥不染者以其根蓮也子誠蓮也則可非蓮則壞矣嘉靖二年冬十二月十日李君中風遽卒距生之年成化六年十月六日五十有四歲耳君之父淮府典寶副以君貴贈奉直大夫戶部員外郎配潘氏張氏皆贈宜久君先娶時氏繼和氏僉事維之孫進士暉之女也生子曰夢鳳側室子曰夢松女三一適張鏐學生一適董漢監生一適張時興舉人孫女一曰啓孫先是空同子謂李君曰死生有命富貴在天信矣然人之富貴之去身也則智慮衰謀計左而其將死也

則魄奪心亂徃徃犯忌諱昧戕伐斯自爲之亦天與命使之乎李君曰氣窮則神離故爲之者人而所以爲非人也空同子曰君子以理制氣以定俟數是故丁陽九而神不爲之摧所謂修身以俟之者故曰旣明且哲以保其身李君知其問爲已發乃伸眉掀髯蹶然而笑曰子亦聞道外之道乎吾方叩玄牝挾素女逃名於沈湎娛樂之區而神游乎溘埃敲塵之外子亦知之否乎空同子曰君以仙爲的邪仙即解尸出神然竟旋轉氣中久亦消之矣况未必仙乎相顧一笑乃後不逾月李君墮馬又旬餘中風口不能言目第直視執空同子手握之者三意若悟前相顧而

笑者然莫及之矣歿之再逾年爲嘉靖乙酉夢鳳等
奉君之柩以閏月六日葬之通許七里灣有封有樹
而求志焉於是爲之志而銘焉銘曰有永永者孰謂
之短有奕奕赫赫者孰謂之淺歿而有聞孰謂匪遠
泉深土滿望之巍如纍如君子之阪乎

明故中奉大夫四川右叅政崔公墓志銘

嘉靖五年十一月廿六日中奉大夫四川右叅政崔
公卒于家年八十有八歲矣先是其子南祭酒銑抗
疏求致仕歸是故公之終所事無憾焉君子謂祭酒
能子矣公諱陞字廷進號南郭學者稱南郭先生其
先樂安人也有諱大者生彥和彥和生剛趙庫大使

後累贈中憲大夫延安知府大使娶于蔡後贈恭人
以正統十四年十二月十四日生公于安陽乃後遂
籍安陽公童時會父失官貧兄五四各出自營獨次
兄父母居日一食然猶糲也而公於書顧益攻久之
悴母蔡憐之泣謂曰兒從兄賈不易效邪公弗聽顧
愈益攻書年廿六李給事中者見之異焉遂女以女
後封淑人明年爲成化乙酉公舉于鄉己丑登進士
第拜都水主事改武選以父憂起改主客又以母憂
起武選擢職方員外郎出知延安府陟叅政敷歷中
外凡三十餘年公旣以蓬葦力致青雲巨才洪識遠
越倫葦而冰蘖奮勵無殊寒約遂能輝前裕後慶流

于子孫至今相人訓學誨德必曰不見南郭公少時
貧邪今人凡少貧至貴顯必焚而公主客時番人有
踰請者業賂鈞樞者許之矣日趣上議而公執弗僉
名番人夜持玳瑁奇香各十餘斤餽公斤之出旦聲
其事遂寢公雖歷三部階五品然僦屋而居兢兢如
少時出則一瘦馬青布袍耳僮日出拾馬遺淑人李
維諸新手爨之故自爲郎官識者業以台輔期之矣
先是星變求言公與餘干蘇章同奏暨闡干政妖僧
蠱惑援比儉士竄逐忠良所致又言兵部尚書王恕
今之伊傳不宜置之南京奏入不報而他言者或頗
及 宮禁秘密 上爲之怒於是書言者六十人姓

名于屏擬升則緹其級不則遠惡地於是吏部故選
公獲免 孝宗即位乃有延安之命邊都瘠耗習猾
而俗夷公至立規畫固扁鏞謹簿書節浮浪省游宴
時出入退果菜私園乃清疆場覈徵稅平徭役鋤豪
橫招流逸墾荒閒實廩庾乃始葺廢墜療疾疫敦行
布惠黜邪崇禮興學誨徒咸鑿鑿名實詳具行狀中
先是成化末郡大飢民大半亡漢中山谷中公蒞郡
復者十六七會屢豐斗米數錢耳斯不足觀政邪公
嘗見宜川知縣唐來馬鞍驚曰鞍如是華邪廉其價
近百金曰有一鞍百金者邪遂收按之果盡獲其貪
狀黜來又杜文祥者延之巨猾也見公惠而實易之

每大言曰崔誠好然貧官也聞其自少貧吾起大獄必使之窘意公聞之必關節而公佯若不知者已而有發其殺人事者公鞠之然罪不至死遂生之議者謂公內明而外容剖大決難靡動聲色頗似稚圭亦相之山川之鍾歟而不知履堅秉貞識體負器自郎署時定矣在郡七年擢四川右叅政弘治丙辰監營壽王官於保寧役者數萬人費覈而力舒戊午逆中王于境民無擾者人稱之公行部勾稽既詳顧又喜廉減否與僉事曲銳齊名蜀人語曰崔叅曲僉屹如雪山嘗如松茂得暈疾久弗愈己未秋遂致仕歸歸三十年至是卒公恭儉出于天性少壯隱顯一耳

故能芻豢蔬糲文錦布緼輪奐蓬茅器無飾銀服無裁綺家居檢書課農灌溉花竹年踰八十則日焚香靜坐精神內瑩聰明長存出入不杖卒之日顏面猶生也雖天畀之遐如報公者然祿位未擬議者每有蒼生之憾斯非命而何邪嗚呼傷哉公生子三長南祭酒也次鉉次鈇女亦三長適丁璽千戶次適賈澤次適張吉俱學生孫子四瀉舉人次汲次涌次泮女六長聘樊剛錦衣指揮次適劉仁學生次適李世隆次適張宗茂學生餘尚幼曾孫子一士臬女一公卒之明年月日葬鹿澗之兆與李淑人合淑人先公六年卒業自有志刻石銘曰積之豐用之嗇中折其翼

井渫終食象賢肖德有瑗有寔安公茲城聚靈發祥
虎變鶩翔英英洋洋後其大昌乎

明故 博平王教授蕭君墓志銘

博平王教授蕭君雅字惟正其先長沙人也後徙廬
陵瀘源遂爲廬陵人已復自瀘源徙衝頭於是爲衝
頭蕭氏然衝頭有環溪二乃人又多稱雙溪蕭云君
高祖蕭以信保寧提舉以信生文寶南安教授文寶
生桂望桂望生蕭祐號居易子著梅竹山房彙二十
卷稱居易先生居易聚彭氏生兩男子矣一夕夢社
壇樹綵幟已而復生君君生而穎特旣長爲縣學生
立文飭行諸生莫先也乃諸生顧易第君乃獨弗第

乃獨貢而訓導松江學訓導六年丁居易憂歸服闋
改英德學仍訓導二年滿代去至京師會 周惠王
諸子封又河南撫臣奏諸 新王乞擇人輔之便於
是君陞教授輔 博平王君乃諫 王曰臣聞之前

事不忘後事之師故往者來之矩也古者今之鑒也
是以易申往行書著有獲詩嚴率由之訓禮發琢玉
之譬皆言人以修成也故舜稱好問禹拜昌言由聞
過則喜師書言於紳何也罔自聖厥乃聖罔自賢厥
乃賢也故曰甘我者賊逆我者德夫聖賢未有不由
師而成者而况其他乎故岐伯卜隨務光熊羆之倫
以微加貴而不謂之過軒堯舜文諸人以尊下卑而

靡謂之誦故曰非師曷質非學曷能夫經史者道之
寓而迹之昭也 王誠欲不失其令名必書焉事矣
王聞之起謝曰善善於是建書堂積書日與教授君
遊而聽其講說 王父 惠王聞之則復大喜曰令
蕭教授東書堂與 世子暨 諸王講說 世子暨
諸王乃咸敬禮君稱先生而 王出閣也君復條修
身檢行尊德樂善數事上焉 王生日則作養正軒
箴 王號思誠子則上思誠子說號述古道人君則
作述古道人序咸託諷云初 王議請增君俸秩不
行會君九年任於是 王時為請賜之勅階登仕佐
郎云正德甲戌君見 王曰臣今年八十歲矣願辭

王歸骸骨 王瞿然止之曰孤自與先生遊幸日聽
道論講說今二十年餘矣乃今忍遽舍我去邪居無
何君病 王親臨視致醫起君竟不君起也是年九
月十八日也先是 王業遣內使營後事至是復遣
官來視其殯斂三日 王親臨奠焉周自 定憲來
率死諱凡喪葬事無敢 王聞也死則曰老曰乾甚
則其宮中人亡也礮以駭鬼若 博平者亦謂修義
慕彰克厥終始者矣蕭君生於宣德乙卯五月二十
三日娶尹氏先君卒繼娶楊氏君有男子二長曰霽
娶戴氏次曰方兩妻皆劉氏女曰爵貞妻劉愛孫男
子四尚文尚忠尚賢尚魯有孫女二人云君著有平

軒存橐衝頭公景雙溪十詠蕭氏家規暨嶺南纂修
雜錄二卷蕭方來言曰明年奉父柩歸葬於衝頭細
阮口原與母尹氏舍李子曰嗟乃予觀漢諸王國相
則咸名流云乃其最賈長沙董江都張河間斯亦極
一代之推矣今周 諸王輔善終始無疵跌則有蕭
君然予先大夫亦嘗為封丘輔終始猶蕭也銘曰柔
自取束強自取柱我視其遇無細無巨巨細之來展
予斯安展而罔安斯云素餐譬玉為玦為璉為環
王門盤桓卑尊審寬優焉游焉彼謂我隱而我則官
歸寧於故山

明故奉政大夫山西按察司僉事賈公谷葬

志銘

此墓葬奉政大夫山西按察司僉事賈公者也賈公
通許人也墓在其縣東三里岡子羽墓南蓋賈氏此
園自鉛山知縣贊始建賈公葬四世矣知縣生封監
察御史麒麟御史生山東叅議恪叅議生賈公賈公生
正統十二年十月戊辰以進士為絳州知州改易州
尋陞前官弘治十年正月壬申卒年五十一歲厥妻
劉氏正統十三年十二月辛未生年十七歸于賈成
化十一年二月甲申卒年二十八歲繼妻婁氏天順
四年五月乙巳生年十七歸于賈正德十一年正月
庚戌卒年五十七歲二人者贈封皆宜人於是葬二

妻賈公一墓劉一乳雙男一曰希朱一天已復乳女
曰咸英妻乳希文希尚亦乳女曰絲英希朱今爲府
學生希文陰陽訓術先妻亡矣希尚引禮舍人學生
娶于韓訓述娶于杜舍人娶于楊女咸者適時植植
知縣也夫婦以節死旌絲者適李永暉永暉監生絲
亦先妻亡而賈公以卒之年四月丁酉合劉氏妻以
卒之年九月丙午合賈氏劉氏而妻之合也希朱者
始徵銘李子李子曰嗟賈氏賢哉羣哉然予業銘其
兄宏墓矣乃今復銘賈公墓賈公名定字仲一自稱
一庵子語人曰吾一庵足矣或詰之曰君之一獨庵
乎公笑而不荅已而曰吾仲一也安得庵不一或又

詰之公曰吾讀易人也庵得不一乎於是詰者退謂
人曰賈之一謂太極耳公知絳也絳有屠人誘人出
而殺諸谷中歸而私其妻妻不從屠又殺其妻而擄
其女鬻之跳事久弗白公廉誅屠者事竟白會大飢
疫公在絳絳獨活主者以絳獨活也於是求策於公
公則上救荒八事是年又平垣曲之盜京之北遷也
偶有獻棗栗者歲例徵棗栗公知易州則條園林登
耗之狀以聞得半減焉諺曰穀要自長言蔣之者人
成之者已也夫州縣之吏不之爲世之擇也尚矣以
今賈公觀之則所謂矮屋跛足者然乎弗然乎大同
卒魏旺者伎富人郝賢仇之而挾其族愚嗾之使與

郝毆才相豎拳便扶之歸夜計殺愚者誣郝郝破家
然猶不得脫竟誣服獄具且行刑矣會公爲僉事覆
按竟白其事於是郝禮天曰吾無以報賈君願出錦
幕孔子像公爲僉事又有時政之書其畧曰絳有積
薪逋者破家糜軀而逋弗完也定知絳也嘗通一州
丁戶足其逋自是絳薪歲無逋又曰知絳時嘗爲善
惡二籍歲終則旬稽誅賞之又曰山西土狹而險有
三王國祿入鹽粟均輸便而論者則又謂公之二配
皆名家克配公劉通許三劉家女婁則都御史良孫
也初參議君園居榴花開會劉聰携其小女來參議
君見其女喜之即手花綰其髻後以婚賈公往有盜
入賈氏劉俾公語盜簪珥所曰毋擾恐老姑也賈知
絳時絳有蔬園姑曰蔬多爛無益市之婁曰諾退則
陰積俸金如蔬直跪進姑曰蔬市矣此其金也賈公
出按守備官張贊賂無由通乃詐書曰賈令取冬
衣婁聞之驚曰渠出冬衣固備斯詐也二氏者可謂
有相夫之才者矣婁撫劉子女如己出人尤稱之云
銘曰苟逾其紀雖璧亦毀有隕而妍有沉而輝淵於
美此公而埋此坎中二媛式從許原隆隆望之光虹
黃棟之芻考君子藏

空同先生集卷第四十六

北郡李夢陽撰

文 墓志一十一首

封丘 僖順王墓志銘

博平 恭裕王墓志銘

鎮平府大輔國將軍墓志銘

鄆陵府四輔國將軍墓志銘

梁夫人墓志銘 妃劉氏墓志銘

夫人賈氏墓志銘 趙妻溫氏墓志銘

明故申宜人墓志銘

明故封太安人裴母張氏墓志銘

明故奉訓大夫代州知州邊公合葬志銘

墓志十一首

封丘 僖順王墓志銘

僖順王者封丘 溫和王子也溫和父曰 康懿王
康懿父曰 周定王周定父是爲 太祖高皇帝
初 溫和年四十餘無子憂之時先大夫爲 王教
授 王問教授何以能子先大夫對曰仁者必後於
是 溫和戒嚴刻務寬惠削謀計斷酒省慾已而連
生四子 僖順其四也獨肖其父父虬髯乃諸兄不
虬髯獨 僖順虬髯先大夫退而私謂人曰 王之
傳四鎮國乎吾竒其貌已而長男天二三以花生廢

而 僖順果王 王諱訢同銘母梁夫人也以弘治元
年閏正月二日生二十三年爲 王王十四年是
爲嘉靖三年十二月七日而 王薨年三十有七耳
訢聞 今皇帝驚悼遣祭議謚營葬乃嘉靖五年
七月十有九日葬汴城南四十里小黃河北實行人
邊彥駱奉 勅經營之者 王爲人英雄有材略然
心恒上人業豢僮媵徵聲樂交豪貴結勢權收置木
石將大治宮室未竟而殂初 王好夜宴鐘鼓管籥
闐喧徹宵雞鳴月墜香粉銷落烏履雜糅而其興愈
酣或勸焉 王弗之從也竟以此殂妃劉氏六子三
女皆嫡出長子先卒次安湜襲其爵次安汀次安澂

次安泖餘未名也銘曰 大明建侯同姓者 王強
支基布周則蕃昌封丘三傳 僖順逾揚御下以嚴
賓友用禮內獲賢助外有任使 溫和捐館廩無餘
米庫鮮剩錢朱殿蕪圯 僖順承之蹶然而起錦爭
寶瑟玉竿珠履享厚中奪斯也常理三世並庶今嗣
則嫡 國祚無疆襲繼綿述生氣是乘而祉永錫
博平 恭裕王墓志銘

博平 恭裕王者 周惠王第十三子也諱安滅自
稱思誠子又號迷古道入母曰蘇夫人以成化十三
年正月廿七日生嘉靖四年六月十六日薨年五十
一歲計于 朝輟鐘鼓一日遣行人楊東祭而營其

葬事竣乃復又 勅議謚令書之旌頌焉導之葬咸
典也 王卒之明年是為丙戌乃葬 王泖城東之
邊村其月七月其日十七日也 王長男封鎮國者
賢而孝豫窺其父墓堊石堅於是為封為樹為饗堂
喪戚而易禮敬而文君子謂 恭裕有後矣初 惠
王生男子二十餘泖老曰氣分則漓即其壽德其索
平會 世子暴殂而 平樂義寧諸王訐獲罪人益
以德難獨 恭裕讀書親友忘勢嗜善修補東書堂
集帖校誠齋錄輯貽後錄養正錄著錦囊詩對諸書
教授蕭雅張鳳等輔之也例初封 郡王米二千石
及 恭裕為王裁如襲封止千石 恭裕則勤心治

生起宮室置田園備車馬盛賓客饒僮奴褒然爲
諸王首而臺省之官縉紳之夫湖海之客鮮有不造
其門者次第名德必首曰博平博平云王有四
男子妃鄧氏兵馬鉞女無出宮人戴氏生長鎮國曰
睦柯娶都夫人張氏生次鎮國曰睦擴娶劉夫人又
二子未名封而生女子十二長曰金縣縣主儀賓盛
時升次曰涇陽縣主儀賓揚汝丹次曰單縣縣主儀
賓王恪次曰上蔡縣主未婚餘者幼銘曰用物精多
爽之神明 王七世 祖配天作京大邦奠中建侯
于周 定憲簡靜懿惠承休弘本茂支積厚發光年
嗇德豐厥後之昌龍旂葆羽駕虬駟馮風御氣英

靈輝煌

鎮平府大輔國將軍墓志銘

大輔國將軍者三鎮國將軍之長子而鎮平 恭靖

王之孫也諱同鈺 周定王系有子同安睦則同者

於 定王爲曾孫矣初鎮國娶於楊生兩輔國暨廣
武遂寧二郡君而廣武郡君生左宜人左宜人配按
察副使李某則大輔國者於吾妻實母舅而爲之甥
之夫者義弗得銘辭矣輔國生天順元年七月廿五
日十歲 憲宗皇帝賜名十三封輔國將軍祿八
百石長而婚於賈賈封夫人夫人二年無何卒初鎮
國慈柔罔埋於厥家緇人丹士又日來給破費之以

是鎮國雖千石然恒貧及輔國則自立產鉅萬金起
宮房長廊曲榭魏樓置鐘鼓美人九宴二八代進更
歌迺舞絲竹之音諧比亮瀏泛蕙流桂迴雪駐日明
燈既入樂及編舞雜鳴月落香粉雜唳屣履繡香如
是者四十餘年會 累朝明聖四海平晏歲稔時和
正德十六年正月九日輔國卒年六十五矣先是賈
夫久卒 勅修北岡之塋輔國以卒之明年月日葬
與夫久合生于一十二人安沮安澈安渺安池安洽
安淋安汀安濡安涿安濱安洙安沫俱封奉國將軍
女五人長平陸縣君配儀賓張輔次隴西縣君配儀
賓趙璋三尚幼孫男十俱幼孫女長襄垣鄉君四尚

幼銘曰北岡之南古河之干崇而乾窾而金棺載接
載安

鄆陵府四輔國將軍墓志銘

四輔國將軍者鄆陵 安僖王孫也 安僖王四子

四曰某封鎮國將軍而娶王夫人鎮國亦四子四者
四輔國云四輔國十歲以例封祿歲八百石貴矣然
純慎不以地高人而好詩書樂與衣冠徒遊嘗讀前
史覽功名之會輒撫卷慨然而嘆曰嗟誠使某備一
官更生普鼎敢多吾哉又見豪貴人千金飾狗馬衣
裘聚名姝罔費惜及義施顧一錢忍弗能與則又嘆
曰雙火一膏兩斤獨木是速滅之道耳且貧富命也

孰有義而損者邪於是婚喪弗舉者輔國見之輒與
醵酒或棺人曰輔國壽揆厥心行永之占也居無何
輔國病歿矣年四十一耳於是豪貴人反以輔國爲
口實相語曰匪火自焚匪斤自樞輔國生成化丙申
九月十八日卒正德丙子十一月十九日以戊寅年
十二月廿六日葬繁臺之東 今上遣官祭 勅
有司塋焉輔國亦四子某某某俱封奉國將軍四
子咸好文下人士有父風云女一未封銘曰初

帝天造法屯建侯厥子次五俾 王于周實維 文
昭翰垣中州 定王旣歿 憲也則立賢而無後
簡以弟及是生 鄆陵枝敷葉分由鎮而輔父子將

軍於穆輔國年縮操芬賤貨遠奢欽賢擇文於赫宗
藩周也實蕃衆絢驗色羣羽知騫繁臺東垠修阡櫛
粉於中者墳輔國將軍

梁夫人墓志銘

梁夫人者封丘 溫和王夫人也父曰梁昇母曰杜
氏夫人生順天八年十一月甲子年十四入 王宮
有姿才多能少言 王異之禮焉入宮十餘年而生
子子十五歲而 溫和王薨薨十餘年於是梁氏子
立爲 王王立乃母梁氏請 皇帝若曰母以子
貴封梁氏封丘 溫和王夫人是時夫人年五十矣
鳳冠雲帔坐於上於是 王暨諸將軍跽奉觴稱壽

退而王妃暨諸將軍夫人進奉觴壽歲時常而
王問寢視膳日惕惕得夫人權夫人顧乃病於是
王惶惧涕泣選醫慎藥禱神祈祇冀夫人瘳乃夫人
病愈益增久之痰痿失音王涕泣跽問張目領之
而已正德十二年八月廿二日竟卒受封四年矣
今制王夫人卒 皇帝遣官祭而有葬典先是

溫和王薨與妃趙氏合葬洪福岡岡在汴城南四十
餘里而梁夫人葬則穿穴 溫和王塚傍而祭與葬
皆如制葬之日卒之明年五月李某曰往予先大夫
為教授輔 溫和王以是先母高宜人歲時朝于
王宮歸蓋數稱梁夫人云彼予尚童稚然今猶歷歷

記先宜人言梁夫人蓋賢嬪云 溫和王隆準而虬

髯軀不甚修然聲吐者鐘焉先大夫嘗私語曰 王
必壽 溫和王五十餘生 今王果六十七歲而薨

今王娶劉氏妃生子二女三皆嫡 溫和王父曰

康懿王康懿王父曰 周定王周定王 高皇帝

第五子也以是 今王年甫壯而行不卑於它 王

銘曰有都者嬪淑慎且仁厥美用振始微終伸以獲
于天以育以延蕃錫翩翩賁于丘阡

妃劉氏墓志銘

妃劉氏者鎮平 端裕王妃也妃祥符人祖安監察
御史父珣以妃授南城兵馬副指揮初妃以名家聘

王王尚孺成化甲午 王十歲矣例當封然父在又
庶也於是封鎮國將軍而明年劉氏封夫人封夫人
五年是爲成化庚子夫人始歸于將軍又五年乙巳
將軍進封 王劉氏封亦進妃然妃罔乃育顧弗妬
育於是盛氏育子某封鎮國將軍天王夫人育子某
今爲 王何氏育子某封鎮國將軍張氏育貴池縣
主配儀賓陳中云君子曰螽以和繁樛木詠言瓜摘
則稀黃臺是思故寬惠斯賢多嗣國延女非茲有宅
善成後也 端裕王薨弘治乙丑薨十二年爲正德
丁丑而妃氏卒 王之薨也 勅墓汴城東紅船灣
矣及是 遣官妃祭 勅有司開 王壙合焉 王

薨之年十一月十有六日得年四十一妃卒其年七
月廿三日得年五十六合之日正德戊寅十一月六
日也 端裕王父曰 榮莊王榮莊王父曰 恭靖
王恭靖王父曰 周定王往聞諸父老曰 定王之
蒙化時 恭靖王襁褓云間關夷蠻萬里往旋乃竟
名壽顯軒綿繁多賢斯所謂哉者培之邪 今王事
母妃謹無殊離于衷其終也哀由衷也茲宗之巨歟
銘曰殊根並蒂齊之義珠沉玉翳雙乃備拓靈播磨
衍所昆承哉繩哉生氣乘

夫人賈氏墓志銘

夫人賈氏者輔國將軍鐸夫人也夫人蓋通許人父

曰賈宏滄州判官母曰王氏判官父恪布政司叅議
叅議父麒封監察御史監察父贊鉛山知縣判官弟
定按察司僉事定弟宗宗人府儀賓賈氏蓋四世甲
郡中而夫人者會又輔國輔國者鎮平 恭靖王孫
而七鎮國者子也七鎮國女弟又配儀賓宗接姻重
戚賈氏貴盛矣而夫人乃顧謙約孝敬沉慧姑田夫
人者嚴人也杖人不百不止夫人事之顧事事當姑
夫人意權其心輔國者見夫人事事當姑夫人意也
於是悉家事委夫人夫人即又事事當輔國意權其
心於是輔國優游日書史酒食與學士遊及有子女
夫人視諸妾子女無殊已子女於是又盡當諸妾意

權其心而夫人子河詩書文雅謙約孝敬沉慧又盡
如夫人故君子謂輔國有子賈氏有甥諺曰胡荻不
結瓜菽根不產麻言物必有種也今以賈夫人觀之
信哉初夫人童時面盆中曾見軒幢華蓋之形驚指
謂人及長家人夢人送夫人以霞帔而僉事定時知
絳州亦夢之故賈氏諸女無如夫人貴者然天固定
之矣夫人生成化十六年十二月廿二日以弘治七
年十二月歸輔國正德元年奉 今皇帝誥封夫
人正德十五年正月廿九日卒年四十一歲夫人疾
革也猶力起頽擲坐子河暨諸子女侍涕泣問夫人
弗荅也徐而曰吁予侍汝父二十七年矣今幸全而

終吾目瞑矣夫吾伯叔姊妹者八也支離而夭折者多矣而吾幸而爲夫人有子若孫吾尚有憾邪河間之愈益慟有聲夫人曰河母慟也人孰非死者已而曰取我服用珍綺諸物來於是盡散諸子女妾者會輔國亦歔涕泣問夫人曰終事慎而已永久之徒事觀美無益也輔國又問夫人笑而曰君慮閔損單衣邪何問之數也竟無悽色哀鳴焉將絕曰取命冠服來此國典也吾冠服之見祖宗於地下君子曰夫死者人之大閑也今觀賈夫人臨絕而不亂女之君子邪而輔國昨見予則曰夫人蓋名瓊英云曰咸英者僉事定女也爲時知縣妻時知縣死賊也其妻見賊而後死之夫人聞之曰吁吾姊見賊而後死乎不如不見賊而死之爲愈也李子曰予讀書晏傳見其摭撫賢淑六種是分未嘗不嘆婦材之難也今觀賈夫人生平之懿臨絕之音不爲全乎雖然其壽嗇矣與之角者將去其齒乎輔國與其子河詣李子請曰夫人以卒之年十二月一日葬城東白塔原願先生銘之李子曰予往聞夫人而嘗嘆婦材之難也銘烏乎辭乃銘之銘曰坎而封者同邪貞而淑者獨邪沉而輝者珠邪藏而潤者玉邪吁夫人吁夫人

趙妻溫氏墓志銘

溫氏者予友趙澤妻也正德十年趙君拜開封府儒

學訓導挈其妻暨諸子來越五年是爲正德己卯而其妻溫氏卒自溫之病迄其卒趙君周旋鬱悒踰禮而過情其歛也有鵲立棺首咻咻鳴趙君曰嗟匪妻之靈孰爲斯鳴於是仰天大慟頓地哭已而爲異鵲之歌曰鵲之來爾毛毳毳亡人孔哀鵲咻咻入我戶歷我筵式裂我肝已又爲悼亡詩數百言歌之聞之鮮不泣數行下者或問李子知友者友趙爲斯何也李子曰禮緣情踰情以賢過昔者予也居趙同巷焉游同學焉謀同道焉寢嘗同榻焉又嫂呼溫以是知溫之賢稔趙千戶者趙君之父也守禦安邊營而趙君來游於郡學於是溫事其父母其父若母安焉溫生五男子一女趙君學弗能時歸看諸子溫感育之俾成人趙君往告予曰微吾妻吾奚免於離憂離憂則中曲亂中曲亂則學弗成及趙訓導也俸薄而屋隘日逐逐執官送迎歸衙也塵埃滿面目衣振之簌簌土下趙或慚而憂溫笑而慰解之曰君慚學成而官卑邪憂在人下逐逐苦邪然命也於是旋旋奔具類器更其土衣或手造嘉飲食勞其夫日爲常於乎若是者足謂之賢不邪賢之則情必過情過則禮必踰禮踰則歌必哀故曰趙之於溫也賢之也非獨妻也溫延安衛指揮之姪女父曰溫某母某氏以成化丁亥十月生卒年五十有三矣其仲子惇奉其襯西

葬安邊營古寺山趙千戶墓次銘曰爾夫弗揚行而有彰矣爾年弗長育而五郎矣爾死異鄉丘首故疆矣

明故申宜人墓志銘

申宜人者河南右叅政董公妻也父曰申潔潔兄申洪錦衣衛千戶初董娶於李病而無子乃更娶陳氏居無幾李卒於是繼娶於申而陳氏則大不平鬧曰吾儒門女也父兄謂李病無子乃始副室於君然恒日夜念曰李或不幸卒吾女其繼之矣乃今繼申氏女邪於是宗族鄉黨聞之私爲董憂曰申入門二女必鬪爭董之家其索乎暨入門申氏孝敬慈婉言動

循矩家人有過蓋之不以彰背而密訓之曰汝過幸官人弗知也知之不撻汝邪久之家人悅雖陳氏亦悅於是以嫡之禮奉申而申乃又不敢以嫡加之陳恩義若姊妹然於是宗族鄉黨聞之則咸喜相語曰董中書福人也獲斯二賢年餘陳生子瀾申抱之育爲已子已又生子潤暨女申又咸抱之育爲已子諸子女乃咸亦不自知其非申出或唆之曰汝曹實非申出諸子女不信也已而知之乃顧益母申弗替董之中書也李嘗封孺人矣暨爲戶部員外郎李申並進宜人於是宗族鄉黨乃又咸喜曰賢者必福董爲叅議副使四品一十二年弗遷往來逢路申處之無

戚容然恒語董第清苦自勵暨董陞今官申亦不爲
動嘉靖元年董覲挈家此次郎暨其女婚還也申徧
探眷屬徘徊第宅巷陌靡忍去是時歎父年七十餘
矣攬衣泣而訣聞者業頗誦之曰申夫人今年三十
九耳何得悽楚如此暨抵汴痰發遽卒是年十二月
廿一日也明日李子造吊焉二子哭之甚形容摧毀
李董通家同進士同寮然猶不知二子非申出董於
是始涕泣道故以墓銘云李問申生之年董曰申生
成化甲辰正月十有一日小名七姐然前李氏生成
化己丑亦正月十一日小名亦七姐申卒之明年是
爲嘉靖癸未瀾扶母之襯歸五月三日葬邑南葛林

務祖塋之次與李氏同云董名銳字抑之玉田人也
瀾娶王氏 周府左長史春女潤娶方氏少卿某女
女適藥暘指揮某長子也銘曰貴匪盡智壽豈無愚
修短者天人或昧諸冠冕佩玉豈無非才哲人其萎
於聖攸哀是之謂命君子俟之天有流馨永有取嗤
蕙霜夙零孤雄鳴悲我銘我傷夜臺或知

明故封太安人裴母張氏墓志銘

軋州裴君爲戶部主事時迎其母張氏養于官三年
封太安人已而裴君進郎中陞衛輝府知府乃奉其
母行抵衛輝居無何母病尋卒君號哭使使再拜稽
顙以幣狀走大梁而見北郡李子曰子故寮也又鄉

人尚襄我銘事俾有耀于幽李子乃再拜受之曰嘻是余鄉人之母又故寮也厥胡可辭按狀太安人其先醴泉人也徙爲軋州人父曰張忠母曰周氏太安人之歸于襄也逮事其祖父母父母祖父母見其克婦道也喜顧謂其父母曰孫媳婦賢而善事我必與吾家其父母退而私又相慶曰父母謂媳婦賢必與吾家乃後襄公中舉爲知縣有美服食太安人對之輒泣曰往祖父母父母謂襄氏必興也今即弗大興也然足以養之乃胥弗逮矣知縣公感其言於是嗚嗚相對泣矢曰余決不忝於先人未幾知縣公卒太安人每對襄君語輒又泣曰汝父以不逮汝曾祖父母暨汝祖父母也恒矢曰余決不忝於先人然卒弗大興也所不齊恨以歿者謂有汝也襄君感其言卒中進士有今官及其拜今封也太安人則輒又泣曰汝父往雖謂有汝然不及見汝官也言旣嗚嗚淚數行下於是襄君益感泣砥礪名行是用有績于官蓋其封太安人時而知縣公亦贈如其子初官云李子曰余往來道軋州軋州人謂予曰知縣公蓋故有兄弟云然肯異居而蚤亡太安人收其孤養之俾各有妻成家銘曰正統辛酉二月二十六太安人有正德庚午八月十日太安人卒夫諱曰倫字曰秉彛子名曰卿扶襯西歸合葬于故山廢宮是安

明故奉訓大夫代州知州邊公合葬志銘

奉訓大夫代州知州邊公既卒之四年是爲正德甲戌而其子貢復按察副使提學於河南而奉其母董孺人者來居無何董孺人卒於是邊子仰天大慟絕而蘇曰吁天天乃使母不見貢舉子邪已而曰天天使章上而涕子過也而母胡死於客所已而邊子果舉一子而憤母之不及其子見也則益復大慟絕而蘇曰吁天天乃獨不使母百日延邪乃又靡使貢子舉而及母存於是抱其子告之母名邊羽云邊子奉其母喪還將合之奉訓公墓而詣李子再拜請曰於乎微子孰志微子孰銘於是李子再拜而受之曰於

乎微邊氏人其謂予文諛文曰邊氏者故淮陰人也曰朝用者元末避亂走歷城而贅歷城王家稱王朝用朝用生王一誠一誠生王文質文質有二子長曰安次曰寧寧生而異稍長颺言曰我邊氏也呼我邊寧曰大邊氏必我後其官果至應天府治中乃治中罔金畜書也輒倍金獲之久之書萬起萬卷樓謂人曰吾子孫必有以文興者治中生邊節邊節者奉訓公也字時中號介菴子奉訓公生而更異英特即六七歲時見者美識其非常兒云董孺者歷城豪也故善治中及見治中郎異則益敬治中思與昏一日治中大置酒會有董公邊郎立偶傍董公董公抱之起

坐膝上曰呼我舅邊郎應聲曰舅我呼汝甥邊郎應聲曰甥如是者三董公顧治中大笑滿堂皆笑於是客盡起觴兩公賀而交其襟割之盟兩公復笑客各復笑醉乃罷散去奉訓公年二十董公女歸焉生十有七年矣是爲董孺人云董公女歸會治中亡厥金求焉治中毋萬太君者叱止之曰新婦賢不愈獲金乎於是名新婦金而明年奉訓公爲學官子弟爲學官子弟人謂必立取第顧久不第第也乃會試又不第於是可立第者久不第或竟不第也必曰邊時中邊時中云邊公坎坷者復二十年始有代州之命而州故稱多豪家固時役公至州則徧召其長老而集

之廷語之曰若民也柰何弗役於是布誠申約陳說分義言意懇怛諸長老無不感動泣下者自是無敢弗役公檢獄簿囚夥以問吏吏曰此逋租者爾曰胡不少寬之吏曰脫則挈家亡矣邊公慨然而嘆曰吁未孚而責之暴未期而逆其亡茲豈父母之道哉於是與囚期而釋之使歸已而囚果如期至如是者三年代州大治會中官瑾用事天下以賂行公執古獨不以賂行而忤中謁者已又與御史者拗也坐是免官歸人有咎公執者聞之董孺人大驚而密解邊公曰斯時何時渠謂歸不官若邪於是日治具佐邊公與鄉人醉游客至則瞿瞿手自辦具然尚惴

惴懼不當邊意而邊亦每加禮於孺人每呼曰孺人
孺人而其子貢則泣涕告我曰孺人事萬太君敬如
其夫事主宜人如事萬太君王宜人者治中妻也茲
亦其天性云貢又曰孺人儉稔不理於綺華徃受封
也有命服矣拜封不復服有時貢請服孺人笑曰孺
人卑階爾俟汝大封我則服之此雖其細小然巨者
可推矣邊公卒之年爲正德辛未六月乙未距其生
景泰庚午四月巳卯得年六十二孺人卒於正德丁
丑閏十二月壬申距其生景泰癸酉正月乙亥得年
六十五初治中以子孤也取王宜人弟之子城子之
孺人即弟城猶弟也城有婦孺人即又姊城婦猶姊

也治中歿也城求去城有私畜孺人知之竟不發亦
不以語邊公後孺人病且死會城婦自歷城來匍匐
於終事孺人生二男子長貢也始官博士孺人封貢
爲給事中其父母歷城大常丞其父母在代知荊州
府父卒歷城次日賦天無子一女子曰劉嫁而寡尋
亦天貢取柴氏繼胡氏妻馮氏生羽者賦取趙氏邊
子謂李子曰貢以毋卒之明年月日合毋於奉訓公
墓墓在祖墓之次祖墓在歷城東二里地曰蓮渠墓
皆枕離而趾坎銘曰謂天無知治中肇之允茲蹈茲
謂天有知代州則屋華隕輝沕懷貞遽畢故材有衆
損苞貴時遠碩果之延祺至如掇孺人乃夢垂榴鬮

空同先生集卷第四十六
如生我所觐愛匪罔愉厥園有楊修阡實良五世爰
利二魂妥是

空同先生集卷第四十六

律